



Jumat, 25 Juni 2021
Ogen: Kejadin 1:26-27



"Sora Dibata"



Manusia meherga i adep-adepen Dibata”, enda me sada ungkapan si tuhu-tuhu baci jadi sada caranta ngergaken kegeluhenta i adep-adepen Dibata. Melala jelma gundari, lanai ngkelengi dirina. Ibabaina dirina ndalanken ras ndahiken kerna perbahanen si langena ate Dibata. Dibata nepa manusia erpalasken ogenta Kejadin 1:26-27 guna kegeluhen si mehuli. IjadikeNa kita seri ras tempas Dibata, gelah biak-biak Dibata e banci si usih bas kegeluhenta. Sentudu ras tempas Dibata eme sura-sura Dibata nandang i kegeluhenta, segelah geluhta e ersikapna i lebe-lebeNa. Manusia eme tinepa si mehergana kal, iberekenNa man banta kerna tinepa si mehergana *eme akal ras pikiren* gelah banci ndalani kegeluhen rikut ras ngkelengi tinepaNa sideban. Tapi kinatana, kegeluhen manusia enggo melala si ceda perban dosa si melket si lalap ngkuasai kegeluhen manusia. Meherga denga lah kita e, adi tangtangna sura-sura Dibata gelah banci kita ndalani kegeluhenta e guna ncidahken kerna biak Dibata i bas kita ngkelengi doni enda. Pernah nge begindu *sora Dibata* bas kam ndalani kegeluhenndu. Sora Dibata e ngerana arah kesah si nggo ibereken man banta adi kita nggeluh ngerembakken dirinta ras IA. Sora e ngasup mabai kita nggeluh seri ras tempas Dibata. Si ngajari, si menuntun, si mplimbarui geluhta gelah kita ndarat bas kelbung dosa nari. Sora Dibata ngerana adi kita megegeh bas totonta i bas kita nggeluh ersada ras IA. Me nggit kam megiken sora Dibata e, mari sipekena kerna kiniersadanta ras Ia. Adi sedekah enda, kita nggeluh ndauh ras Dibata, si pejore geluhta e arah nggeluh ersikapna i lebe-lebeNa. Si biasaken ersaat teduh, si biasaken muji ras nembah IA, si biasaken ertoto jadi kebiasaan bas geluhta, si biasaken erlagu-langkah bagi si ngena ateNa, si biasaken rukur alu perukuren si meteruk i lebe-lebeNa ras si biasaken ngerana alu mabai kemalemen ate. Kalak si ngerembakken dirina ras Tuhan, tetap nggejapken kuasa Tuhan.